

**Nunalerinermut, Imminut Pilersornermut, Nukissiutinut Avatangiisinullu
Naalakkersuisoq**

06-05-2025

Suliap normua: 2023 - 5071

Oqaluuserisassani imm.: _____

Naalakkersuisut isummernissaannut tunngavissiaq

**Erngup imerneqarsinnaasup pitsaassusia aamma imermik pilersuiviit
nakkutigineqarnerat pillugit Namminersorlutik Oqartussat
nalunaarutaannut siunnersuutip tusarniaassutigineqarnera**

Inassuteqaat

Naalakkersuisunut **inassutigineqarpoq,**

- erngup imerneqarsinnaasup pitsaassusia aamma imermik pilersuiviit
nakkutigineqarnerat pillugit Namminersorlutik Oqartussat nalunaarutaannut
siunnersuutip tamanut ammasumik tusarniaassutigalugu nassiunneqarnissaa
akuerineqassasoq

Aallaqqaasiut

Erngup imerneqarsinnaasup pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaanni nr. 63, 4. november 2021-meersumi (imermut imerneqarsinnaasumut nalunaarut) § 38 nutaaq ilanngunneqassasoq siunnersuutigineqarpoq. Allannortitsinermit inuussutissanik tunisassiornermit imermik imerneqarsinnaasumik nammineq inuussutissalerinermit suliffeqarfiit tunisassiorsinnaalissapput, ilanngullugulu nalunaarummi pitsaassusissanut piumasaqaatit saneqqunneqarnissaannut immikkut ittumik akuersissuteqartarnek.

Inuussutissanut inatsisini imermik imerneqarsinnaasumik atuinissaq pillugu piumasaqaatit unioqqutinnagit, inuussutissanik tunisassiornermit imermik immameersumik sukuluiakkamik atuinissap Royal Greenland-imit kissatigineqarnera, allannortitsinermit pissutaavoq. Imaq immameersaq sukuluiagaasoq tassaavoq imeq imermut imerneqarsinnaasumut pitsaassusisanik piumasaqaatinik naammassinnittoq, erngup annertuumik tarajoqarnera tassani ilaanani, tamatumami malitsigisaanik pitsaassusissanut piumasaqaat ataaseq qaangerneqarpoq.

Inuussutissanik tunisassiornermit imermik imerneqarsinnaasumik atuinissaq pillugu piumasaqaateqarnek pissutigalugu allannortitsinissaq pisariaqarpoq. Piumasaqaat ilaatigut inuussutissanut, EU-mut avammut nioqqutigineqartussanut, atuuppoq. Immikkut ittumik akuersissuteqartarnermit aalajangersakkap, inuussutissalerinermit inatsisini inissinnagu, imermut imerneqarsinnaasumut nalunaarummi inissinneqarnerani, erngup immameersup sukuluiariikkap, pitsaassusissanut piumasaqaammik ataasiinnarmik qaangiisup, sulii imertut imerneqarsinnaasutut nassuiarneqarsimanissaa qulakkeerneqassaaq. Taamaalluni imermik imerneqarsinnaasumik atuinissaq pillugu piumasaqaat naammassineqassaaq.

Peqqissutsikkut ajornartorsiortoqalinnginnissaanut piumasarineqarpoq, erngup pitsaassusaa inuussutissat naammasseriikkat peqqinnartuunerannut sunniissanngitsoq. Peqatigisaanik piumasarineqarpoq, qinnuteqaat inuussutissalerinermit oqartussamut nassiunneqassasoq, tamatumalu kingorna taassuma qinnuteqaat inuussutissalerinermit oqartussap qinnuteqaammik naliliineranik ilaqartillugu Nunalerinermit, Imminut Pilersornermit, Nukissiutinut Avatangiisinullu Naalakkersuisoqarfimmut ingerlateqqinneqassasoq. Tamatumani inuussutissanut tunngasunik suliatigut eqqortumik nalilersuisarnissaa qulakkeerneqarpoq.

Tamatumunnga attuumassuteqanngitsumik, aamma nalunaarummut Ilanngussaq 4-mi erseqqissaasoqarpoq, taamaalluni imeq RO-nut suliaqarfik (omvendt osmose) sunniuteqarluarnerusoq atorlugu sukuluiarneqarsinappat, imermut tarajoqanngitsumit imermik sukuluiagaanngitsumik misissugassanik tigusisoqartassanani. Taamatut ilaatitsinnginneq imermut tarajulimmut aamma imermut tarajornilaartumut, RO-nut suliaqarfik atorlugu imertut imerneqarsinnaasutut sukuluiarneqartartunut, atuutereerpoq. Ilaatitsinnginneq *imermut tarajoqanngitsumut* aamma atuuttoq erseqqissaannarneqarpoq, tassami RO-nut suliaqarfimmi imeq tarajoqanngitsoq, imertut tarajulittuulli pitsaatigisumik, sukuluiarneqartarmat.

Tunngaviusoq

Royal Greenland-ip pisut ilaanni imermik, Nukissiorfiit najukkani imermik pilersuiviisa pilersuutigisinnaasaannit annertunerusumik, pisariaqartitsisarpoq. Taamaattumik Royal Greenland immikkut ittumik akuerineqarnissamik qinnuteqarpoq, taamaallutik inuussutissanik tunisassiornerminni imeq immameersaq sukuluiagaq atorsinnaalissagamikku.

Inuussutissalerinermit inatsisini tunngavilimmik imermik imerneqarsinnaasumik atuinissaq pillugu piumasaqaatit saneqqunneqarnissaannut Naalakkersuisut siusinnerusukkut immikkut

ittumik akuersissuteqartarsimapput. Taamaattoq inuussutissalerinermut oqartussat naliliipput tamanna imermik imerneqarsinnaasumik atuinissaq pillugu EU-p piumasaqaataannut unioq-qutitsinerusoq. Taamaattumik aaqqiissutissaavoq imermut imerneqarsinnaasumut nalunaarummi allanngortitsinissaq, taamaalillutik inuussutissalerinermut suliffeqarfiit nammineerlutik imermik imerneqarsinnaasumik tunisassiorinissamut immikkut ittumik akuersissuteqarfigineqarsinnaalissallutik, ilanngullugu erngup tarajoqassusaa pillugu immikkut ittumik akuersissuteqarneq.

Aningaasaqarnikkut sunniutaasussat

Aalisakkanik piareersaalluni suliarinninnermi atorneqartussamik imermik pilersuinerup taper-taqartinnissaanut periarfissiisoqarnerani, siunnersuut inuussutissanik tunisassiornermut pitsaasunik sunniuteqassasoq naatsorsuutigineqarpoq.

Immikkut ittumik akuersissuteqarnerit nalinginnaasumik imermik imerneqarsinnaasumik pilersuinermut annertuunik sunniuteqartinneqassanngitsut, nalunaarummi erseqqissarneqarpoq, takuuk tusarniaanermut immikkoortumi matuma kinguliani eqqaaneqartut.

RO-nut suliaqarfiit pillugit erseqqissaaneq Nukissiorfiit annikinnerusunik sipaaruteqarneranik malitseqassaaq, tassami imeq tarajoqanngitsaq RO-nut suliaqarfik atorlugu sukuluiarneqarsimappat, imermik sukuluiagaanngitsumik misissugassamik tiguisoqartarunnaassammat.

Attaveqatigiinneq

Inuussutissanik tunisassiornermi imermik immameersumik sukuluiagaasumik atuinissamut immikkut ittumik akuersissuteqarnerit maleruagassiiviginissaat pillugu suleqataasut attuumasutillit aallarniutaasumik oqaloqatigineqarput. Oqaloqatigiinnerup kinguneraa, imermut imerneqarsinnaasumut nalunaarutip allanngortinnissaanut siunnersuummik ilanngunneqartumik Naalakkersuisoqarfiup suliaqarnera.

Naligiissitsineq

Siunnersuut naligiissitsinermut sunniuteqassanngilaq.

Tusarniaaneq

Siunnersuut suliffiup iluani tusarniaassutigineqarpoq. Tamanna killilinnik oqaaseqaateqarfigineqarpoq, missingiummi ilanngunneqartumi takuneqarsinnaasunik. Tassunga ilanngullugu erseqqissarneqarpoq, sumiiffinni nalinginnaasumik imermik imerneqarsinnaasumik pilersuinnassuseqartuni, inuussutissalerinermut suliffeqarfinnut imermik imerneqarsinnaasumik pilersuinissamut annertussusiliiffiusimasuni, imermik immameersumik sukuluiagaasumik, imermik imerneqarsinnaasumik tunisassiorneq nalinginnaasumik imermik imerneqarsinnaasumik pilersuinermut annertuunik sunniuteqassanngippat, aatsaat immikkut ittumik akuersissuteqartoqarsinnaasoq.

Siunnersuut 2024-mi oktobarimi tamanut ammasumik tusarniaassutigalugu nassiunneqarnissaa pilersaarutigineqarpoq.

Bentiaraq Ottosen

/

Natuk Lund Meire

Ilanngussat

- Erngup imerreqarsinnaasup pitsaassusia aamma imermik pilersuiviit nakkutigineqarnerat pillugit nalunaarutip allanngortinneqarnissaanut missingiut, ilanngussat ilanngullugit